


Pedro Wilson:

## **"Nos ta bay all the way pa yuda e adictonan, no matter what"**



ORANJESTAD (AAN): Dialuna durante un conferencia di prensa, Fundacion Un Oportunidad Mas (FUNOM), a anuncia nan accion di recauda fondo cu ta importante pa e ayudo cu nan ta brinda e adictonan den necesidad. FUNOM ta yuda prepara e adictonan prome cu nan drenta un centro di rehabilitacion.

Varios ex adicto cu awor pa añanan largo no ta uza droga mas, ta yuda e fundacion voluntariamente.

Un di nan ta Pedro Wilson.

El a splica cu 22 di Februari 1995 tabata ultimo dia cu el a uza droga.

Segun Pedro, e ta gradici su sponsor Juni Diaz kende tabata tey pe semper durante e periodo na SAMBA y cu semper tey pe ainda.

El a bisa cu su "turning point" tabata ora cu un sra Chines na SAMBA a dune un abrazo, apesar cu e tabata hole stinki y tabata sushi.

"Nunca mi a lubida esey y ami tambe kier haci mescos", segun Pedro.

El a sigui bisa cu despues cu el a Sali for di SAMBA y el a haya un trabao, el a cumpra un jug cu su prome salario y den dje el a traha juice y el a traha pan pa e pasa parti pa e adictonan riba caya, pa asina nan haya algo di come

y bebe.

Tur caminda e tabata pasa cu su auto segunda mano di 2000 Florin y tabata trece algo pa e adictonan den chollerhouse of bao di palo di kwihi.

El a splica cu ora c Centro

Dakota a habri pa trata adictonan, e y otronan cu awor ta forma parti di FUNOM a trece hopi cliente pa worde yuda.

Tambe a trece adictonan pa SAMBA.

Segun Pedro, door di su pasado tin biaha tabata dificil pa haya un trabao, pero el a keda persevera y el a haya entre otro trabao di security, door di ayudo tambe di hendenan di bon curazon.

El a splica cu FUNOM kier yuda tur adicto sin discriminacion, mirando cu tin varios di nan cu kier worde yuda y pa un motibo of otro no ta ricibi e ayudo na ora.

"Nos ta bay all the way pa yuda e adictonan, no matter what", segun Wilson.

Diario. - (diabierna 28 september 2012). p.10